

Dangui Oduber

Pueblo tin cu paga pa parkeermeter pa por cubri gastonan di mantencion di tram



ORANJESTAD - E gobierno aki simplemente no tin compasion mas pa pueblo. Nan a priminti pueblo cu NO lo bin medida, nan a bisa pueblo cu nan ta bay mehora poder di compra y reduci e costo di bida.

Nan a bisa pueblo cu ora nan yega den gobierno e placa lo yega y nan lo inverti den pueblo. Awe despues di 6 aña di gabinete Mike Eman 1 y 2 e gobierno aki a ricibi na entrada 6 biyon florin, nan a fia 2 biyon florin adicional y asina nan a ricibi un entrada so 8 biyon florin. Di e 8 biyon florin aki nan por hustifica solamente 128 miyon florin anto e ora nos tin cu puntra nos mes unda e resto di placa aki a bay? Awe nos pais ta bancarota, gobierno ta strangulando pueblo y comercio cu medida practicamente tur siman.

Parkeermeter

Despues cu nan aumenta e prima di AOV cu 30%, pone pueblo traha te cu 65 aña, aumenta BBO ta na 3.5%, cobra 312 florin pa recoge sushi, aumenta grondbelasting y awor ta bay cuminsa cobra pa parkeer auto den Oranjestad. Fuera cu pueblo ta paga un cantidad di belasting, paga pa number di auto awor mester paga tambe pa parkeer auto den Oranjestad. E tristo di e medida aki ta cu e suma di placa ta pa cubri gastonan di mantencion di e locura di e tram.

E aña aki 2015 so e tram lo costa pueblo 5 miyon florin. Gobierno di Aruba a dicidi pa bay compra 2 tram mas y cada un di e tram nan ta costa nos pueblo 1.2 miyon florin. Total gobierno ta bay gasta 2.4 miyon florin na e tramnan aki y e gastonan di mantencion pa tramnan segun presupuesto 2015 ta 3 miyon florin. Por conclui a base di e informacionnan aki cu e tram den aña 2015 lo costa nos



pueblo 5 miyon florin.

Prioridad robes

Esaki ta simplemente un prioridad robes y deroche di placa di pueblo.

Awor den e situacion cu pais Aruba ta den bancarota, ta corta y reduci gasto tur caminda anto bo tin placa pa 2 tram mas, ta ridiculo djis pa pensa cu ta bay saca 2.4 miyon florin pa 2 tram mas. Ni cu minister Sevinger busca 10 tram mas, e mester reconoce cu esaki no a duna e resultado cu nan tawata buscando. Esaki ta simplemente un decision robes, un prioridad robes y un malgastamento di placa di pueblo. A keda demostra caba cu e tram no a yuda trece mas turista en caya pa haci compras. E intencion ta esey toch?

Bay papia cu comerciantenan pa wak si nan te bende, bay puntra nan con e situacion ta, bay wak e relato di banco central. Comercio ya caba a duna di conoce cu e tram no a duna ningun pero ningun resultado pero pa capricho di minister Sevinger cu su proyecto a fracasa ta sigui insisti den compra di 2 tram mas. Mientras ta kita placa di e pensionado, di e handicap, di e deportista tin placa si pa 2 tram.

Abuso

Esaki ta simplemente un abuso y un muestra un bes mas di e prioridadnan robes di e gobierno aki. Aña pasa minister Sevinger mes a confirma cu 12% di turistanan cu

ta bin cu crucero so ta haci uzo di e tram anto e ora abo ta puntra bo mes pakico a bin cu e tramnan aki? Cerca kende nan a wordo compra? Kende ta esunnan cu a wordo beneficia cu e compra di e tramnan?

E medida di cobra pa parkeer den Oranjestad no ta hustificabel pasobra e placa ta wordo uza pa cubri gastonan di e tram. Pueblo no a pidi pa tram, pueblo no a vota pa tram y tram no a forma parti di e campaña di AVP tampoco pero awe ta pueblo ta wordo castiga cu mas y mas medida. Gobierno ta sofocando nos pueblo y bo ta mira esaki na e aumento di criminalidad caminda ni turistanan no ta scapa. □

